

四庫全書

集部

欽定四庫全書

林登州集卷十七

明 林弼 撰

記

燕坑朱氏瀟峰祠記

瀟峰字子方備萬其子也仕至大學士叔服備
萬子也仕至興化牧官今縉雲縣丞敬業叔服
也子

家必有廟而鄉先生歿得祀于鄉所以崇孝而廣敬也

祀於家親親也祀于鄉尊賢也親親尊賢父師之道立矣豐城朱氏自洞雲先生家學已有原委滿峰先生又從會而濬之至備萬君涵淳街迤益溪以宏君思世傳有自建堂以祀其祖洞雲翁父滿峰翁又推而及於從祖雪澗碧泉月澗翁鄉之人士以數君子之德之學淑其祖若父以及其子孫義難專祠於家因命其祠曰精舍時而致敬藏祀視舍

音

萌禮有加焉備萬既自記之

而措紳章衣之士又序而述之矣弼竊謂備萬之建祠

蓋祀於家之義鄉人士共祠焉則固祀於鄉之意也備萬不敢忘親親之孝鄉人士不敢忘尊賢之敬使夫後之人目擊而道存孝敬之念愈傳而愈遠是舉也有三善焉故為書此于諸作之左

聽雪篷記

天變化而成象日以暄之風以散之雨以潤之凡有聲色之可接者皆人之所共聞見也然所遇之時不同則耳目之所接者容有異焉日或畏其炎也風或畏其寒

也雨或苦其浸淫也然於冬則為愛日於夏則為凱風
於及時則為甘雨莫不喜見而樂聞者亦人情之常然
也乃若雪之為物玄冬之寒沍六陰之凝結其容粟如
其氣冽如固衆人之所同畏也而君子則喜聽之聽之
於竹樹聽之於窻戶無不可者而必聽之於舟之蓬也
何哉蓋景之至清者莫雪若而雪聲之至清者莫篷若
君子之所取其在於斯乎予友豐城劉君伯序謂弼曰
吾嘗隆冬歷彭蠡過匡廬泊舟五老峰下遇雪大作湖

山綿亘萬頃同縞夜卧舟中雪紛披撩亂撲篷之聲淅
淅焉灑灑焉若春蟲之食葉石泉之落澗欹枕之頃魂
夢俱清因思王子猷命舟訪戴安道蓋不異於此時而
景與心會清興之發自有不容已者宜乎後世尚其風
致而以為美談也繇是心不能忘因名吾齋居曰聽雪
篷子幸為我記之予謂伯序嘗歷館閣出守外郡汴長
河浮滄海其聽雪於篷下非一矣于斯時也必曰天其
以是為豐年之瑞乎吾民或有不免於饑寒者乎其心

固惓惓以國以民為憂也今乃隱約弗見而以聽雪為
意豈遂忘向者之言耶抑予所謂所遇不同而所接有
異者耶君曰用舍出處各有其道用而出也則為嚙臠
之蘇武坎墉之李愬舍而處也則為袁安之高卧孫康
之映讀是雪之聽在此猶在彼也隨遇而安君子奚擇
焉予曰是可記矣請為子書之

竹軒記

物之異於常物君子恒有取焉者以其有比德之益也

蘭異於草者也而屈有取焉梅異於木者也而逋有取焉菊有取於陶蓮有取於周亦異於水陸之華也蘭於君子之修潔者有似焉梅於君子之清逸者有同焉菊之與蓮於君子之特立不汙者有況焉其取之也固宜今夫竹之為物也以言乎樹則非梅之倫以言乎草則非蘭之儔以言乎華又非菊與蓮之朋也君子抑何取於是哉豈非以其心之虛類君子之體道乎其節之直類君子之秉操乎其色蒼然而不可干類君子之嚴威

儼恪乎在易震之象為蒼筤於方為東於德為仁君子
之比德舍是孰先焉詩人美衛武之德必托喻於淇澳
之竹而惓惓言之然則物之異於常物非人之異於常
人者不能與也廬陵彭君雲從作軒竹間萬玉森繞晴
碧彌望客至輒清坐疊疊忘去因為題曰竹軒間請予
言記之予惟彭氏世以儒業顯君揚聲臬司克振祖風
虛以體道直以秉操儼焉恪焉有君子之容蓋於竹比
德而與之相友益焉者也雖宦遊江海而於竹軒每不

能忘夫苟有得於竹則竹我為一目之所接雖無竹焉而竹固寓於吾心則身之所履何適而非是軒也哉夫是之謂不滯於物不膠於迹而德益以充矣

雲溪堂記

雲間佳山水而三泖為尤勝世家望族亦惟泖中為多曹氏其一也其族有曰子章者給事中書禮曹嘗謂弼曰某世居泖湖吾父嘗即湖曲作堂五楹以為宴息之所某兄弟讀書其中每佳賓清友亦於是燕集焉堂前

臨于泖雲影溪光氤氳鬱勃上下交映於是援琴作水雲之曲溪聲泊瀾相和於几席間塵心俗慮為之一洒故名之曰雲溪兵餘堂廢吾懼無以繼先人之志也重作堂於舊址今苟完矣先生能為予記之否噫子章可謂能子矣書曰厥父基厥子乃弗肯堂矧肯構子章其肯堂肯構者歟夫苟堂之不構則雲溪之景無所攬結固將望雲而有陟岵之思臨溪而有逝川之嘆昔之樂緒皆將轉為悲端矣子章思其親而新其堂則雲溪之

景存而親若存者非徒為觀眺之勝而已余老矣倘得
乞身以歸遊於七澤三江之間尚能登是堂以賦雲溪
之佳勝以繼玄真子江湖散人之遺躅君其許之否乎

清安堂記

吏部尚書李君奐文名其所居之堂曰清安間謂弼曰
吾以是名堂雖得於偶然亦有取焉者也子幸繹其義
以記之庶有契於予衷也弼曰君之名堂其幽且遐者
固非弼所能知然以弼之所至言之則不能無說而不

知於君之旨有合乎否也夫清則必安不清則不安也
是故心清則體安氣清則神安思慮清則夢寐安此一
身清而安者也父子兄弟夫婦舉盡其道則家政清而
一家安矣卿大夫士各盡其職則國政清而一國安矣
推而遠之莫不皆然君性樂易善容物而介然以慎廉
自將所至而人安之數歷中外且十餘年寵辱不驚也
喜怒不形也物我不較也其中之所存者湛然若水之
止也皎然若鑑之明也蓋本源澄徹則湍瀾無自生體

質瑩淨則塵垢無自入故隨所處窮達休戚吉凶禍福皆所不計也然則清也者其安之本與君子居是堂也即其高明正大之域則所存者清矣於是而伴奭優游焉則所居者安矣存之清其近於主一之敬者乎居之安其近於安宅之仁者乎敬以守之仁以行之道不外是矣君其有取於此乎君曰吾之所取者堂之清而身之安云爾而子推言之詳其義為益廣矣章書子言以為記

退思齋記

四明張君起鳴言於博陵林弼曰昔予讀書山海間嘗
名齋居曰退思或者病予學之弗力而行之弗勇也敢
求子言記之庶得枯羽鏃礪之益焉予曰心者思之官
也學必思而後得行必思而後善力於學矣不知退而
思之則無得於心勇於行矣不能退而思之則或害於
事今子優學出仕而慎思之功亦云熟矣奚庸予言之
贅哉姑以仕之當思予之同病者為吾子諗焉夫一心

之存甚微而事變之來無有紀極一或不思則自失之
悔不可復追吾思有益於上則怨已歛而謗讟興矣吾
思有益於下則事不集而譴訶至矣予每病於是公退
之頃未嘗不默坐以思而忘寢食也吾子亦嘗以是為
思否乎位卑則思稱其卑位高則思稱其高是身之所
處無適而不思也思而不出其位則吾之分內者得矣
自外至者我遑思之乎哉子幸退而思之以為進而有
為之地無徒學老氏之思退而置其身於無所非刺之

域也起鳴作而曰請書此以為規

龍岡書舍記

距姑蘇城西一舍許有山曰天平其陰為龍池塢山水之佳秀至是而萃其勝焉周君長聞葬二親於塢中不忍舍其松楸以去而又愛其山水之勝也即墓傍隙地作室若干楹兄弟讀書其所因名曰龍岡精舍君用薦躋仕中外凡允中留居舍中他日長聞謂予曰某也二親之葬宰木拱矣兄弟廬墓傍讀父書朝夕之頃展省

墓下若親猶在也今焉游宦四方萍踪梗跡每興霜露之思則龍岡精舍若在吾目子幸為我記之噫讀父書於家固難矣讀父書於墓尤人所難也記曰父沒而不能讀父之書手澤存焉耳夫先世積書固有望於後人之能讀也朝焉夕焉目在書而心在親蓋有悠然之思矣若曰吾讀是書立身行道當以古人自期待庶於吾親無忝而顯揚之可遂也矧夫墓以藏親之體鬼孝子之心每慕戀而不能忘焉先儒嘗論墓祭非古蓋恐後

世重於墓而輕於廟也然終不能奪人子之情而墓祭不廢焉周氏兄弟即墓而廬即廬而讀書以不墜於先業可謂能子矣鸞誥推恩賁於泉壤龍岡之山川草木亦當為之增輝改色霜露之感母徒多思為也君名備繇和順令歷兵部主事今為通政司經歷以廉慎稱其政本於學云

野航亭記

南靖邑大夫朱君元賓作亭雙溪之上縱橫僅丈餘板

為周堵蓬代上茨流水在門青山在牖退食與二三客
嘯咏其中曰是非舟耶因題曰野航或曰取杜詩語也
或曰朱君有山水癖曩為游洋今更南靖皆山水邑得
山水之勝惟舟為然此亭所繇名歟君曰客見吾之容
矣未見吾之意夫人之生也若浮焉則此身亦一舟也
矧游宦海之中泛焉東西南北之不膠譬猶虛舟之四
觸未知所底吾思有以濟人之涉顧以野航之小所受
不大則所濟幾何吾惟盡吾方之攸遇者耳非敢過負

重以取危也彼有萬斛之舟貯積既重篙師不謹悠然
自放於無涯之淵而曰吾舟則大其卒覆溺於風濤者
比比也吾實有創于此故名吾亭以寓戒焉予曰嗟夫
凝焉而下至大而厚者地也而天與水實負之地亦一
大舟也山嶽崎焉而不重河海融焉而不洩萬物之無
不載庶類之無不育也惟所受者大故所濟者衆也君
子法地之道誠以為舟仁以為楫義以為帆檣則將以
大舟大受而大濟矣豈有向者覆溺之患哉書曰若濟

巨川汝作舟楫航乎航乎其充爾之大者乎君聞予言
走告予曰請書以記遂不辭而筆之

持敬齋記

姑蘇翟君大年為吏部員外郎予忝在禮曹獲定交焉
既而相交益久而相敬益至間謂弼曰某曩以兵亂僑
居松江以不能久敬於人故貽累於已幸而免於譴戾
因自誓於天務以廉正自處敬以持之不敢或忽故以
持敬名吾齋居庶幾事警乎心以自勉於直內之道先

生幸有言以記之夫敬之一字惟聖人能安之而無所
勉其次必有持之之功然後能知所用力而不失其正
也堯舜禹精一之傳湯之日躋文王之緝熙皆是道也
顏之四勿曾之三省思之慎獨孟之操存皆持敬之功
也先儒嘗論存養之功莫先於敬持敬之方莫先於畏
惟畏故敬惟敬則直內而心有所主心有所主則義立
而方外事無不宜矣修己而百姓安篤恭而天下平自
近以及遠則體信達順聰明睿智繇是而出事天饗帝

皆自此而推之然則持敬之道不既大乎即大年之言
蓋為接物而發然處友必慎之於始苟為不然其敬蓋
不能終之者矣大年有懲於前而有警於後宜其持之
之功為益密也雖然持敬之道非特處友為然也凡其
一政一令之施一言一行之發非敬孰為之基本乎大
年能以主一無適慎之於內整齊嚴肅謹之於外使其
心常惺惺收斂方寸不容一物則持敬之功至而聖學
之至可馴致矣弼所言者先儒之緒論也故不敢不詳

及云

質軒記

棠谿之金其在鑛也頑鈍黝黝不異砂礫然其質則美矣及乎鎔鍊之精為鼎為鐘為尊為敦為鉦為鐸飾於疊飾於瓚飾於冠冕飾於簪珥其為文也非一焉崑崗之玉其在璞也粗糲渾淪不異土石及乎琢磨之精為主為璋為珩為璜為帶為珮飾於輅飾於鞞飾於瑚璉飾於几杖其為文也亦非一焉詩人之言曰追琢其章

金玉其相蓋謂文非質不施質非文不形必有其質之美而後有其文之美也是故善自治者恒於物而有得焉內而以忠信為先則質立矣外而以禮文為後則文著矣聖人知穴居野處之不可以常也故為之宮室而有棖題節稅之飾焉知汙尊抔飲之不可以久也故為之燕饗而有籩豆罍爵之飾焉君子知其然也故質而不過於文文而不勝其質禮樂必先進之從奢易寧儉素之守則質而不俚文而不華斯可為彬彬之君子矣

於乎錦繡之麗終不可奪布衣之文膏粱之美終不能
外菽粟之味何者常者可恒而異者不可久故也吾友
蔡君以彥文為字而別號質軒請予記之予惟彥文以醇雅
之質篤實之學謹行檢而善文詞文固未嘗勝質也而惓
惓自省惟恐過焉蓋知文質之兼舉而以君子自期待
者也彥文年四十餘始用薦出仕方將發揮其文以黼
黻治平之盛母徒以質自諉而遂蘊其素也

林登州集卷十七

欽定四庫全書

集部

林登州集卷十八

詳校官鴻臚寺少卿臣梁景陽

中書臣劉源溥覆勘

總校官庶吉士臣何思鈞

校對官中書臣吳俊

謄錄監生臣周克鵬

欽定四庫全書

林登州集卷十八

明 林弼 撰

詔

賜占城國王詔

朕聞帝王之道柔遠寧邇故雖在遐荒皆欲其相安於
無事焉汝占城介居西南阻山絕海而奉貢方物不廢
常儀順者使至貢象四枚聞汝守圉安民勤修國事朕

甚嘉之但汝與安南分疆劃界自昔而然爾其恪遵朕
言息兵保寧勿事紛爭天道惡盈不可自溢恐有他譴
今賜卿金龍衣三襲旗蓋金鼓等物備爾藩國之儀昭
我天朝之貺母恃寵榮自生釁端特茲詔示想宜知悉
誥

贈梅遵祖誥

我國家考禮定制凡子貴者必推恩錫爵逮其父母所
以崇孝治也榮祿大夫駙馬都尉梅殷父遵祖曩在元

季避地姑蘇朕定金陵爾兄思祖灼知天命首舉淮安
全城來附爾以嫌疑殞命於吳天下既定論功行賞爾
兄分封汝南錫以侯爵朕念勲舊之臣用結姻親之好
以第二女寧國公主下嫁爾子殷令特加爾榮祿大夫
僉大都督府事於戲死而為國卹典宜崇魂其有知服
茲寵命

封梅殷母丘氏誥

我國家考禮定制凡子貴者必推恩錫爵逮其父母所

以崇孝治也榮祿大夫駙馬都尉梅殷母丘氏賦德貞淑克生令子尚我第二女寧國公主疏封錫號在禮為宜可封夫人

表

梅思祖謝恩表

具官臣梅思祖誠惶誠恐稽首頓首上言伏于洪武十一年八月內欽奉聖旨以寧國公主下嫁臣姪殷敬擇本年十月日親迎謹奉表奏期者伏以惟聖作法因天

地而盡父母之道惟皇建極體陰陽而立夫婦之倫所以敦敘民彝而化成天下也臣思祖誠惶誠恐稽首頓首欽惟皇帝陛下誕膺天命聿定區宇中外臣民莫不歡忻感戴臣夙興戎伍叨沐寵命闔家百指共食天祿慙無涓埃之補報祇懷日夜之戰兢乃荷聖恩不以臣姪愚庸特命公主下為伉儷自天之錫何地以承吉辰在邇謹用奏請至期令姪殷俯伏闕門之外恭聽恩命下情無任瞻天仰聖激切屏營之至謹奉表以聞

雙

梅思祖謝恩箋

恭惟皇后殿下貞靜之德端居宮闈肅雖之徽協成皇
業一人有慶萬國咸寧誠母儀於天下也臣某猥以匪
才夙從宸御東征西討僅立寸功地厚天高濫竽峻秩
日夜乾惕報稱無從乃今特荷聖恩錫命公主與臣姪
殿下成伉儷榮出望外吉辰伊邇謹令姪殷屆期詣闕
門俯伏以頌恩命尚祈中聽庶達下情臣無任感激惶

恐之至謹奉箋以聞

頌

大祀禮成頌

有引

皇帝臨御大寶立南北郊以祀天地齋明肅恭度越今古而聖衷猶有所未安若曰朕為天子則天地實大父母也父母異堂豈人子孝養之意在昔漢世合祀天地光武重興亦仍舊典自後或合或分議論紛紜然禮緣情制教可義起不若合祀為宜於是建大祀殿於國之東

南以洪武十二年正月十一日行合祀禮刪繁文而就簡憑明德以薦馨先期五日上齋於武英殿天時方雨及祭之夕陰雨開霽風霧不興牲醴潔芬樂舞合節神人交暢聖心悅懌以為祭祀必盡其誠者凡以為民而已故古者有孟春祈穀之禮今大祀既行和氣斯應皇天后土實鑒臨之其所以福我黔黎者於是而有其兆矣過此以往年豐穀登休嘉洊至是皆天地監一人之誠而錫萬民之福也大禮慶成羣僚班賀臣某忝職儀

曹謹敘實錄復拜手稽首而獻頌曰

聖皇攝籙中立作君乾父坤母事之惟均南北有郊起
自周禮圓方之丘陰陽是擬古不必泥今不必拘惟情
之當惟理之須於惟聖皇天德天位議禮制度睿斷拔
萃曰子事親豈異其堂合而祀之禮意始彰惟茲孟春
育物之始矧朕之生實天之子載燔載烈惟德為馨上
下昭格有神有誠天晦而明氣鬱而豁盼饗之通無遠
弗達靈貺大來十雨五風體信達順物阜民豐微臣作

頌用紀盛美垂而不刊國有信史

漳州新城頌

帝式九圍文恬武嬉曷生昏狂虐流毒滋維漳南鄙孰
非王土修我墉壑將固我圉藩臣用憂以屬能賢曰汝
稔改宜知所先相彼故城墉低壑堙高而浚之盍圖其
新侯曰民來根本斯在暫勞久逸力爾無怠載經載營
子來孔殷鞭石山積畚土雲屯懲彼寬瑕務小而堅崇
堞言言壕流淵淵土功既成邊人載寧外侮不驚侯實

我生高為侯德深為侯澤保障之功德載無數

贊

墨仙贊

龍圖畫鳥跡折人文宣資爾力十八公孕爾躬仙之儔
文之宗玄鶴舉遺玉杵洛客客卿蹈前式

廣成子贊

崆峒之松作爾靈壽杖崆峒之雲錄爾長生書惟清也
故形不勞而外舒惟靜也故精不搖而內腴此其高出

物表久視人區千二百年容不悴而神不枯者與

達泉贊

泉之始達猶性之端達而不息則一派之微必放乎四海端而能充則萬化之大實本乎一原是故盈科漸進而君子觀其瀾睥面盎背而君子探其根蓋有本者如是爰取辟於斯言勗哉三近汭流窮源殆將涵泳乎聖涯澡淪乎心天以至浩浩而淵淵者與

了野贊

人生兩間天地而小中立作配惟了當了翳人之生有
哲有愚愚非或損哲豈有餘塞也吾體帥也吾性體歸
其全性復其正是謂之了不忤於人不了其了實愧於
天了之云者奚取於野千里一目了蔑加也謀野則獲
同野則亨了指其實野寓其名彼昧面牆情焉株守知
擴而充八荒戶牖老了其虛釋了其空我了者誠大本
不窮卓哉爾翁克全所有敢誦贅詞書之座右

簑笠翁小像贊

有引

石君履道為南臺諫史涖郡湖湘值撫州兵亂得野人簑笠自蔽間行免好事者圖之博陵林某為之贊

曰

章甫縫掖爾之常被豸冠繡衣爾之素志胡為青笠綠簑與樵漁而為類蓋其中之確也雖笭箬襍襖其於處變如處常其中之澹也雖袞冕繡裳不知孰賤而孰貴矧矛戟之匪職實簿書之攸寄結纓死難仲由有傷勇之名微服過宋孔聖得時中之義此其自決去就潔而

無累豈若擁數萬夫之衆制數千里之地臨難則苟免
見害則必避耶

易道初小像贊

野服角巾儵然出塵孰可儼倫伊昔之人志道之志味
道之味天爵是崇孰識其貴

涂府史王山卷贊

維昔君子於玉比德曰仁與義溫潤而栗玉蘊於山旁
達乎尹德蘊於身輝光日新矯矯涂君溫其如玉璆琳

瑤琨細大並蓄如山之產取之不窮崑崗藍田仰止崇
崇人命是名我求其實琢磨所資他山之石勗哉玉山
企高可齊我庸作詩以繼白圭

牛典簿像贊

以所蘊之數而為清溫之容以所存之正而有凝遠之
風睟然其神澄儼焉其貌恭玉堂之署方寵承於天藻
匡廬之山未寒盟於雲松吾求于古人之中其將無同
也耶

坦然贊

為袁兼善作

君子之心惟循乎理理根於心施於四體中無愧怍外
自安舒平平蕩蕩曷有崎嶇嗟彼小夫心為形役內省
有疚戚戚朝夕城府深密險以自防孰若坦然物我兩
忘對面九疑荆棘是履孰若坦然康莊千里我車既堅
我馬既閑羊腸詰曲曾不改顏最爾袁君守坦勿失允
蹈聖謨永保貞吉

傅夢賢小像贊

有粹其容煥乎陽春有澄其神澹乎秋旻身焉紛華之
場心焉幽寂之濱扇可以清四海之歎琴可以返千古
之淳惟思修潔之在我寧知富貴之迫人行審像之是
求罔俾專美乎先臣

廬隱贊

有引

金陵李思問居京城之南而自號曰廬隱蓋居於廬
而不役於廬者也博陵林某為之贊曰

謂廬非隱有隱者存心在廬外遂忘器喧袞衣繡裳我

樂韋布豹胎麟脯我樂蔬素豈其棲遲必於衡門豈其
寤歌必於考槃屑屑錐刀噐噐狙僧我目所接非心所
會塵非遠地隱豈深藏不磷不緇無迎無將北山移文
終南捷徑身在林藪市朝心競君子出處依乎中庸無
往不返聖訓之從

箴

周伯章寓齋箴

遇與不遇有義有命隨其所取順受其正行法居易以

俟天定不迎不將無違無競用舍行藏訓守前聖敢効
輔仁敬告司聽

張士進知愚齋箴

民之初生稟殊質異有哲有愚知之為貴哲人先幾克
全其天愚而能知曷間後先萬委赴壑千蹊適邑及其
知之合殊而一我知我愚雖愚必明日月經天氣翳廓
清駟騷小夫鑿知自任具曰予聖其愚孰甚知愚非愚
百倍其功不自滿盈無遠弗克勗哉士進真知篤信希

顏之愚庶幾令聞

銘

涑省齋銘

君子之學自省為貴省之之涑常存敬畏反已自飭豈
暇尤人有過必改易怠以勤匪一之省繫百與千是謂
涑省無適不然匪暫之省慎終於始是謂涑省無時不
爾惟省之功理欲之幾顏躬四勿孔教九思孳孳夙興
乾乾夕惕憂不如舜恐蹈於蹠省之於身實省於心內

省不疚居安資深先民有言要在慎獨敢誦明訓敬告
司僕

知止齋銘

維皇降衷明命有赫民受以生均此明德虛而直內靈
以應外水止鏡淨瑩瑩不昧衆牯於形聖明則不推而
新之厥初遂復事理之極曰至善域明已新人此其標
的相彼黃鳥猶知丘隅矧伊人矣而鳥不如聖有明訓
惟理之窮既知於始斯得於終唯知正鵠一矢貫革惟

識郊闕跬步適國涓涓流泉汨汨趨池未至不止既止
不移君子察物日新不息可遠在茲銘言無斁

思貽齋銘

為吳允思作

人心之官所職者思為善不善思則得之矧為孝子奉
親遺體舉足不忘必慎厥履孳孳趨善思以顯揚必果
於為實親之光不善之萌恐致親辱為必不果免淪顛
覆翳爾之思斯親之貽戰戰兢兢庶以全歸惟允思君
克蹈於善舜蹠之間毫釐必辨作堂銘名目擊道存豈

金定四子集卷十八
伊自警將裕後昆蒙也作銘述於古訓孰為我師繇參
入舜

拙菴銘

為中書徐德敬題

大巧若拙不恠不奇惟爾之拙匪愚匪癡蓋其中之存
也不求異於人其外之施也不求矯於時人方役役我
則泊焉而無為人方喋喋我則昧焉而不知過於文吾
寧守其質過於盈吾寧守其虧蓋將全太樸於未散敦
淳風於未漓其亦陶柴桑周濂溪之等夷者歟

適安齋銘

維人之生貴在適志苟志之適斯安之遂桓圭衮裳駟馬高車富貴累人貧賤不如繩樞甕牖羹藜飯糗既適既安此心曷疚潛也歸來容膝易安居無時愿亦歸盤苟得吾樂千金弗易心之所適有介于石卓哉東魯不攸不求樂天知命我心不憂有翼齋居允乎自足述此銘書敢告司僕

正心齋銘

為李思問作

心為思官必得其正正以內存外者斯定凝冰焦火淵
淪天飛心為形役司失其機其機不失主一無適修已
治人胥此焉出天君肅穆居于靈臺事之有道念哉敬
哉

習靜軒銘

為泰和鄧崇雅題

萬動擾擾人心遞移孰司其機靜以自持即物觀理必
於其止靈臺湛然秋月寒水習之之方不迎不將直內
以敬無隱弗彰爾氣既完爾志斯定成艮出震仁義中

正昏默宵冥所習則非靜養動察聖賢同歸

湯氏舊笏銘

有引

吳湯氏槐木笏一宋度宗朝賜進士暉老公故物也
公登第未久而宋亡元世宋士多出仕公隱約以終
曾孫完寶藏其笏兵亂不敢失昔魏謩有祖風而鄭
公故笏以存完蓋幾焉為作銘曰

有笏惟槐槐有赤心我笏則木我之寶也如黃金賜言
之存手澤之芳用雖未究而世美則長笏不忽祖德述

翳人之求尚徵夫故物

三友軒銘

有引

禮部主事甘君友諒清介不忘交植松竹梅於軒前
曰松之心也正竹之節也直梅秉詣孤芳而獨潔舉
不以歲寒而變其素守是即吾三益之友也因以三
友名其軒博陵林弼為作銘曰

益友有三直諒多聞君子取友責善輔仁既資諸人復
接夫物所友則殊所益惟一爾松之貞爾梅之清爾竹

之直三益作朋曰予未知於焉比德時發其英不改其
色詩歌有斐語記後凋騷雖不錄曷掩昭昭既錫爾名
將求爾實勗哉歲寒永保貞吉

崇志齋銘

有序

吏部尚書陳君彥名儒術飾吏事起家為法從歷兵
吏二部以才名稱嘗以崇志名其齋居朝之公卿各
為詩若文以廣其義某謂君之志崇矣志於顏孟以
進其道德志於伊周以勉其功業則凡富貴利祿桓

圭而袞裳茵坐而鼎食明珠兼金寶璐大貝舉不足
以動其心何者其志不在是也既論序之復為之銘

曰

立志必崇勿為卑下卑下之趨乃無志者所趨既高所
培既厚泰華崇崇眼空培塿一貫弗止百仞可齊有志
竟成跬步以躋孟明焚舟司馬題柱志在功名道德奚
取伊周顏孟我志聖賢下視衆人天壤相懸君其崇之
企彼前哲德業顯融百世昭晰

林登州集卷十八

欽定四庫全書

林登州集卷十九

明 林弼 撰

誌銘

東宮妃常氏壙誌

上以義兵剗羣雄定天下開平忠武王常遇春實為開
國元勲女曰某與儲皇同年爰自襁褓即結姻好之約
年若干為東宮元妃勤儉孝敬不以貴富驕盈婦德之

懿誠天下之表儀也洪武戊午十有一月某日以疾薨
上輟朝哀悼命東宮以禮服期乙十有三月生皇孫二
人長曰某皇孫女二人皆幼高祖四三府君贈榮祿大
夫柱國中書平章政事追封開平王謚章簡妣張氏追
封開平王夫人曾祖重五府君贈儀同三司上柱國少
保中書平章政事追封開平王謚安穆妣陳氏追封開
平王夫人祖六六府君贈開府儀同三司上柱國太保
中書右丞相追封開平王謚靖懿妣高氏追封開平王

夫人父贈翊運推誠宣德靖遠功臣開府儀同三司上
柱國太保中書右丞相由鄭國公進封開平王母藍氏
封開平王夫人妃生於某年某月某日薨年若干卜以
是年十二月四日葬于鍾山草堂忠武王墓右臣某忝
職禮曹謹叙其世次名行以誌諸隧石

開國輔運推誠宣力武臣榮祿大夫柱國同知大
都督府事臨江侯贈特進榮祿大夫右柱國杞
國定襄公壙誌

公諱德字

闕

姓陳氏世居濠之鳳陽縣曾祖曰五二

府君贈鎮國將軍僉大都督府事護軍追封定遠縣子
妣吳氏追封夫人祖曰敬贈驃騎將軍河南都指揮使
護軍追封宛丘伯妣李氏追封潁川郡夫人考曰納贈
榮祿大夫同知大都督府事柱國追封臨江侯母張氏
封臨江侯夫人公生於元天歷庚午十一月十一日幼
端重不類羣兒及長有膽畧元季天下大亂上起兵討
羣雄公首從征伐歲乙未克滁和從渡大江攻采石取太

平定建業下京口有前鋒之功丁酉取寧國宣城遂為
總兵元帥轉天策衛指揮副使丁未從大將軍徐魏公
征浙西偽吳既平陞鎮國上將軍僉大都督府事洪武
戊申將兵廓清中原河洛燕晉諸郡俱下天下既定論
功行賞公為初起之舊十有七年之間戰勲居多授開國
輔運推誠宣力武臣榮祿大夫柱國同知大都督府事
封臨江侯食祿一千五百石賜以鉄券子孫世世襲祿
洪武戊午十一月二十有三日薨于鳳陽縣太平鄉之

私第得年四十有九訃聞詔追封特進榮祿大夫右柱
國祀國公謚定襄仍敕有司具葬事配洪氏封潁川郡
夫人子二人長曰庸夫人洪氏出也今為散騎舍人次
曰伴哥李氏出也女三人長為洪出次為李出又次為
李出孫女一人將以是年十二月日葬某里某山之原
惟公以忠勇之資際風雲之會佐成大業為國勲臣雖
年僅中壽然生榮死哀名昭史冊可無憾矣其詳當載
神道碑姑叙其畧以納諸壙云

鎮國大將軍大都督府僉事林公壙誌

公姓林諱濟峯世居滁之全椒少剛勇善騎射元季天下大亂上起兵淮右越國公胡大海時在麾下知公可用養為己子歲乙未從渡大江取太平丙申入建康下鎮江丁酉克常州宣州徽州戊戌破鄂爾和院判營復攻杭州諸縣進取嚴州金華己亥取諸暨圍紹興克處州庚子授金華左翼副元帥復從胡參政取信州就守其城有旨命為總兵辛丑回金華五月仍守信州分兵

討陳友諒獲賊將李明道等壬寅越國公調回金華首
寇叛越國公遇害公守完其城陞昭勇大將軍同僉江
南行樞密院張士誠兵攻諸暨公擊敗之甲辰陞浙東
行省參政丙午領兵駐杭州吳元年授浙行省左丞六
月征蘇州丞相徐達命攻胥門九月克之復攻無錫降
之進資善大夫職如故洪武元年征福建二年收山東
移兵守汴復攻陝西丞相徐公調往平涼三年征定西
歸至鞏昌安定以慢攻失陷軍士降為馬軍四月克興

元上念其功多復授大都督府僉事四年加鎮國將軍
仍令世襲復姓林賜以令名從總兵官中山侯湯和征
蜀偽夏主降八年授陝西都指揮使十一年冬遘疾勅
令回京命尚醫治之弗瘳十二年正月十三日卒于私
第得年四十有三上為之憫悼命有司給其喪具祖三
府君贈昭勇將軍親軍指揮使祖妣許氏追封德人考
小六府君贈鎮國將軍僉大都督府事妣胡氏追封夫
人三子曰懋曰吉祥奴許出也曰兒次室陳氏出也女

三人俱在室惟公弱冠從軍東征西討無役不預亦古
名將之倫也功在簡冊垂于無窮姑叙其槩以納諸壙
詳則具於神道碑云

故龍虎將軍浙江都指揮使司指揮使胡公墓誌
公諱汝字某姓胡氏世居鳳陽之某縣少英邁有志畧
元末所在兵起公拔行伍為親軍元帥大朝兵徇揚州
公率衆內附從御史大夫鄧衛公元帥胡公戍守徽州
已而攻取婺源及淳安遂昌於潛昌化諸縣戍戍從征

處婺克之巳亥攻克諸暨授管軍總管癸卯謝院判叛
公不為所污棄其妻子領兵出蘭溪被旨徵還十月大
軍攻湖廣公在行既克武昌復從攻廬州授鷹揚衛管
軍千戶領兵從丞相魏國公攻取中興峽州及潭衡辰
沅諸城乙巳守常德改授常德衛指揮副使洪武元年
統所部兵從平章楊公攻廣西克永全道三州六月克
靜江府三年以功陞明威將軍本衛同知六月滎陽侯
統大軍征蜀復被旨從征瞿塘關駐兵歸州蜀兵猝至

出城奮擊蜀兵潰去遂入巴東榮陽侯命公統各衛兵
破瞿塘月城夜攻羊角寨拔之冬陞懷遠將軍職如故
四年偽蜀鄒平章水陸結柵以扼大軍總戎德慶侯命
公領兵攻之破其柵鄒中流矢死乘勝入梁山州直抵
重慶府屯兵戍守七月從江夏侯攻取順慶保寧等城
左都督曹國公遣公戍貴州蠻民未附者悉討平之酋
賊的黑覃光印作亂公領兵三路出破其寨數千的黑
來降覃光印猶據險拒守兵連破之所謂硬寨者賊大

潰遂勦殺覃光印及把具等獲其牛馬兵器若干蠻酋
的義以牌送款民皆安堵八年制授昭勇將軍湖廣都
指揮使司指揮使十二月進龍虎將軍浙江都指揮使
司指揮使十一年三月十日卒于官得年五十一曾祖
曰肆府君妣趙氏祖曰五一府君妣霍氏父曰六二府
君妣王氏繼娶嚴氏孫氏韓氏男一人曰混川奴嚴氏
出也女三人一適武昌衛百戶楊仁二在室嗚呼公自
弱冠知武事能識真主委質事之數其戰守之功浙淮

之間固為先登而征蜀之役效勞居多然旌勲之命屢降迭錫秩視二品善始而榮令終而哀其亦人傑矣夫卜以年月日葬于闕之山先期來請誌故為述其功績履歷官秩世次而刻諸石庶以光諸幽云

故鎮國將軍燕府左傳丘公壙誌

洪武十一年五月十五日鎮國將軍燕府左傳丘公疾篤車駕臨問越二日卒宸衷哀悼勅有司治其喪事擇地於聚寶山之陽以葬之仍命刻石誌其壙謹按公諱

廣號毅齊世居鳳陽府之定遠縣曾祖某以公貴贈昭
勇將軍親軍指揮妣艾氏淑人考子誠贈將軍僉大都
督府事妣劉氏夫人公幼失怙恃統軍元帥嚴公鞠為
己子值元季大亂天兵起臨濠之時公年十六隨父從
軍以驍勇知名歲乙未從渡江取采石入太平丙申定
金陵克鎮江公皆與焉八月兵壓常州元帥公營於游
塘淹城賊兵奄至公力戰卻之擒偽吳張將軍十二月
大戰橫林橋中流矢拔鏃轉鬪勇氣逾厲賊見而畏之

丁酉正月攻常州戰于南門矢傷右膝三月克之從大軍攻宣州又克之五月元帥公卒于軍有旨命襲父職授後翼統軍元帥六月領兵取江陰七月從丞相徐公攻無錫常熟大敗賊將張九六等戊戌從平章常公攻泰興九月下溧陽克宜興留鎮焉己亥偽吳張士誠侵宜興公出戰敵大敗矢傷左腕甲辰從丞相徐公拔安豐七月克廬州改授神武衛指揮司同知未幾領兵守潭州乙巳改授潭州衛同知討平諸寨吳元年從楊平

章征廣西洪武元年克永州戰傷左股手擒賊帥鄧思誠等五月攻靖江公率前鋒先破其月城遂降之賊據彬州公領兵復其城得濟縣印至是復丘姓授懷遠大將軍職如故四年征道州常寧武崗及諸寨洞公無役不從所向必克陞鎮國將軍僉大都督府事九年復除燕府左傅公生於至元戊寅歿年四十一葬之日為六月二日配殷氏封夫人子六人長禮李氏出也次智戴氏出也和尚張氏出也文殊奴胡氏出也真保張氏出

也五臺奴劉氏出也女四人惟公英銳夙成勇於赴敵
擐旗斬將戰必居先功在信史垂於永久姑叙其勲績
世次之梗槩以納諸壙云

蘭軒潘君墓誌銘

君諱惠進字仲禮蘭軒其自號也大父某而上皆居龍
溪為氓父瑞治善陶猗理生法奮于編伍累豐積贏遂
大其家母林氏莊氏生子四人君莊出也慎已好義恬
養不表襮克念動趾前美故家力不墮而益厚盛方盜

起兵興富家子率以賄媒武功君獨優游田里朝畊暮
讀泊焉無營識者高之雅性愛厚於人交際各得其欲
閨門族姓雖睦以愉鄉鄰急必賙患必卹人仁其行焉
生於至元壬辰四月甲子歿於至正丁酉七月癸巳葬
以是歲十月乙酉其原在鶴石山之麓君先娶朱氏繼
蔡氏俱蚤世復繼室蔡氏娣朱氏二子勝才王寶一女
勝姐適陳叅軍之曾孫大蔡氏一子順小蔡氏一女丁
娘勝才先君四年卒有孫男曰洪泰寬泰女曰觀姐順

知學好禮先葬期泣拜請於唐臣曰藐諸孤將以先君之柩合窆二母之塋有日矣敢求先生銘辭不獲銘曰
家之豐兮心之冲德之崇兮禮之恭施不窮兮死不終

貢元周先生墓誌銘

自延祐甲寅舉進士先後為科十有二閩士之魁浙闡者凡四人若晉安林仲節景和邵武黃清老子肅建安雷杭彥舟皆登甲科躋仕中外延平周祐于一以至正庚寅在江浙二十八人之上於是兩與計偕而不售於

春官者再士類屈之先生自亂年即知讀書動止端重
異羣兒父小溪先生恐汨其純也延師家塾教之甫長
則盡能通四書五經傳註及冠治舉子業會科目中輟
遂刻志古文先秦西漢諸子百氏韓柳歐蘇之所述作
咀嚼饜飫久益博洽發而為文深雅閑健今南臺侍御
左公世臣曩以閩海僉憲督師漳南先生撮討賊顛末
倣治鑑為野史上之題曰邊臣近鑒左公曰真史才也
薦為同安文學進其書於朝以備國史編錄由是諸閣

老成知名焉靖州推官詹達納有愛女擇對特妻之初先生領丁亥鄉薦恩授廬峯山長再以舉首走京師翰林羣公將薦之史館以親老辭歸至延平奔小溪府君訃配詹氏道卒府君服方除而母復亡嗚呼孰謂母服未練而先生又不祿耶先生質醇學正平居恂恂言若不出口而中之所蘊則渾渾莫窺其際事有疑難質之一言而斷委曲周盡其為校官也從游之徒千里來集善誘不倦皆成其材名讀書之室曰宗濂見其學之正

也壯年有志功業使得展其長庶幾經邦澤民必有大
設施者而拂鬱不揚賫志以歿悲夫世族可知者上世
祖護由建遷延平護生公權權生延宋武翼大夫廣西
路鈐轄閤門宣贊舍人延生大明大明生禮禮生昭先
屬時宋李皆跽隱弗耀昭先生小溪諱蓋才以吏漳因
家焉生先生於皇慶壬子七月癸丑卒于至正甲午十
二月乙卯得年四十有三明年七月壬辰合窆于靈應
山詹氏瑩無子側室女詹家奴尚幼弟祐寔主喪事唐

臣舊學於先生謹叙而銘之不敢以微陋辭銘曰

靈竒天恡而先生取之貪聲名天斬而先生播之覃此
予彼奪孰司其機緘乃年之不永而爵之未擔然文傳
而壽德尚而貴則於彼者又將何憾而何慚

故直翁孫君墓誌銘

至正十四年正月三日臨漳直翁孫君卒里人林唐臣
走哭之曰於虐天其不使斯民為三代乎胡寧奪我直
人之遽也君心直言直行已又直人以直稱之君亦以

直自居而不辭嗚呼直哉吾不能不為流俗惜也按郡
志孫氏漳顯宗昭先仕宋為金紫光祿大夫江東提刑
金紫生叙諧中奉大夫工部提舉工部生志學脩職郎
福州監鎮監鎮生克莊娶同郡許氏生君於元貞乙未
諱頑字祥卿弱歲失怙有弟四人皆幼稚君與兄貞榮
卹之如子教育姻娶則曰厚我可也田廬錙幣則曰薄
我可也性剛介重然諾鄉鄰有爭不訟於官惟求直於
其門君是非白黑灼無遁情信申誄屈抑揚絕無顧避

人曰此直翁也因以自號頗嗜酒歲時伏臘必合兄弟
子姪以燕良辰勝日則命賓為山水游歡洽移日屋前
有水曰南溪酒酣則倚樓歌曰溪水可酒溪魚可羹直
翁直翁了此平生兄弟析異君獨奉母同居歲辛卯秋
奸囚夜亂配陳氏死焉君負母匿空室中火至輒反燄
若有撲滅者人以為孝念所致未幾母亦歿始以哀毀
成羸疾病革子文華進藥輒揮去曰正月三日吾且在
鬼錄藥雖神其如命何其日蚤作呼文華囑後事治喪

不用浮屠葬從先人之兆既而曰吾母未歸土死有餘
戾一慟而絕凡得年六十丈夫子二人皆業儒長即文
華娶王氏次男文質未婚女子三人長適盧德原次適
鄭原真先卒季亦死奸囚之難葬之日為三月甲申先
期文華泣拜請曰子知吾父者敢求子銘辭不獲銘曰
不詐以飾惟正是則是謂古之直匪華以炫惟寔是踐
是謂微之顯薛包友愛許邵公評遺慶後嗣永徵斯銘

林母楊氏墓誌銘

楊氏諱真世居同安縣之員山祖博濟父一暈皆隱德
為鄉善人龍溪於同安為隣壤愚逸林先生以篤學力
行睦其家淑其鄉所至而人則之一暈聞其賢故許妻
焉既歸姑稱其孝夫以其無違妯娌以無間凡奩飾裝
具一無私蓄閨門數百皆同爨會食堂寢以新家廟有
恤賓祭禮洽人謂先生家法之所以齊者實楊氏克相
之也歲癸未先生得疾且殆楊籲天以禱竟不起則斷
髮誓無它時年三十有八矣子皆幼家事日窘夙夜事

麻桌助衣食會兵難連年海瀕多故而母子相保無恙
殆有陰相之者至正丙午十月二十日囑三子曰為未
亡人二十有四年常懼汝曹弗迨成立今皆畢婚吾願
塞矣茲為吾生之年月日亦死期也目皆瞑矣言竟而
逝又明年十一月庚申葬普賢山之原三子曰乾蒙睽
皆從予游蒙來泣拜曰先母以兵故後葬期今寔有日
敢以銘請義難於辭銘曰

禮始夫婦敬始閨門惟內之助實外之敦懿乎林母克

淑以溫婦義母儀久焉彌尊曷弗逮榮于子于孫不亡者存尚徵後昆

福建帥府都事蘇公墓誌銘

至正十六年春正月癸未盜殺元帥分府都事蘇寶及其弟漳浦縣尹和子長泰縣尹信幼子同生伯顏福生孫凱山普安明日盜浮都事公屍于江其友丘昉鄭才識之走告其妹之夫錢塘馮善善與門士陳君玉鄭元圭具棺及衣衾歛焉分府發郡兵旬日殲盜又四年秋

八月庚寅夫人曹氏葬公于胡塞山之陽先期其姊夫黃孟昌來請銘曰先生知公者幸銘唐臣不能文且賤銘不足重公銘非敢當而辭不獲遂銘按公先世趙人居漳為大族四世至公始以武功登仕版筮邵武泰寧尉閩帥忽公聞其賢辟為職官令史湍秩遷連江寧善鄉巡檢階將仕即用八品格也閩重漳分府幕官屈公階職不倫便宜授以都事屬紅巾盜起所在熒惑從逆公贊謀有術汀寇不敢犯境泉盜侵長泰公提兵討其

逆撫其攜貳悉歸正為王民公為人中敏而外寬多慧而少文百藝衆技咸精其能而退然若無識者臨事決議樹大節燭幾微一斷於理蓋有得於問學之素始公受業釣磯丘先生知有身心之學故其見於施為動守古則歲時祀先品儀豐備為漳人法好賢禮士久敬不衰雖臧獲輿隸咸得其欲蓋好禮而愛仁者也然顯盛之餘羣小利其賢而害其權故禍其家所謂盜自憎主人耳公果何負於盜哉公生於至大庚戌享年四十有

七夫人許氏亦死是難子德生以鞠於外家得全嗚呼
此天猶未絕於蘇氏也耶女二人一許出也適興化通
守陳某一蔡媵出也適葉樟公字一之號建溪祖龍發
父天與母顏氏銘曰

有學有言有政有行寧謂善始不終令命垂絕猶續孰
匪天定徵我銘辭尚流後慶

清菴居士墓誌銘

元至正十有七年龍溪清菴居士卒其年十有二月戊

子卜葬于青山之原孤文信衰經走郡城泣血拜請於唐臣曰文信罪逆莫贖先母楊氏歿感時俗不克禮葬貽終天悔今先君復棄人世死不敢重前罪將以先君之柩與先母瓦棺合窆亡妻蔣氏祔先生幸誌而銘之庶幾冥冥昭昭均有責於遠也辭不獲則序之曰居士鄭姓諱靜自號清菴所居里曰士林父曰自先母嚴氏生居士於至元壬申襁褓失恃繼母高氏頗嚴悍居士事之謹而高亦慈畜之不知為非已出娶教授揚公女

諱觀令德克相為婦道為母儀為鄉人稱先居士二十
二年卒得年五十有七丈夫子三人長仁慈事農次文
信業儒又次彌碧學佛女子三人長適林同次適周應
南又次適陳元玉孫男三人進發進達仁慈子也宗虞
文信子也孫女四人曾孫男玄軫居士讀書知大義敦
樸謙厚善容物而於人之是非必嚴抑揚無貸喜靜樂
晦不逐時好則其性然也每語其子曰人必有業不勤
業而成者蔑有也仁慈能力爾穡文信能殖爾學吾志

也聞三山余大車何體仁明經學遺文信不遠千里往
從之游族中弟姪知學者數人居士每勗以遠大或時
舉為怠學者勸先是盜起鄰鄉居士戒里中子弟拒逆
効順毋汚不道里賴以全中歲屏葷酒日焚香清坐誦
佛書與二三老依東林法結淨土社年雖耆耄聰明清
彊如壯盛時褒衣大幘鬚眉如雪望而知為善人也卒
之年為至正丁酉九享年八十有六惟居士隱以其正
未嘗仕而不返壽康令終好德樂善之報乎送死盡禮

教子知學之力乎銘無愧銘曰

實儒而名墨也隱身而顯德也淑爾後人此之則也



林登州集卷十九

欽定四庫全書

集部

林登州集卷二十一

詳校官鴻臚寺少卿臣梁景陽

中書臣劉源溥覆勘

總校官庶吉士臣何思鈞

校對官中書臣吳俊

謄錄舉人臣周克鵬

謄錄舉人臣楊兆豐

欽定四庫全書

林登州集卷二十

明 林弼 撰

誌銘

故象洞巡檢墓誌銘

昔晦庵朱文公以道學鳴漳士及門而得其傳者二人
曰北溪先生陳淳安鄉東湖先生王遇子合皆為高第
弟子北溪篤道恬仕不逮華顯東湖繇曹監躋甲科歷

國子博士常州守終大宗政戶部郎中有論孟講義兩
漢博議行于世戶部生羅源令仲訥仲訥生京學諭自
明自明生天德韜跡祿和不急榮利與母陳氏以儉勤
樹門第君為天德冢子諱永字子長夙承大母若父之
教敏慧知讀書通經史大義不屑屑事浮藻生子曰璘
治舉子業弱冠中堂選人謂王氏書種有自云當至元
戊寅秋畬民作亂寇郡邑君義起民兵從大將進討以
功授武平縣象洞巖巡檢至官未數月則蹙然曰吾家

自戶部公世以儒業顯未嘗有以武功授官者巡檢職卑而責重所治事皆盜賊刑名輕重疑似於是焉兆一或失詳獲戾斯大吾幸得祖父之田與書而耕讀之歸養吾親教吾子亦足樂也烏用微名為哉即其居之西偏築室數椽環植竹木日哦其間客至輒置酒歡洽盡情或有無不計也夜聞子璘讀史傳有葬不必厚之言謂曰我死汝宜法此又數日無疾而卒將絕泣顧其母楊曰兒負兒負君生在至大戊申十二月十五日卒在

至正戊戌八月十八日葬在是年十二月十八日合窆
先配陳氏祔戶部公塋子璘與女瑛之壻陳元宗皆從
子游同來請銘辭不獲銘曰

學之積而卑官為爾職德之厚而中歲為爾壽不豐其
施克全其歸其亦曷悲

益齋王先生墓誌銘

先生諱吉才字伯謙號益齋其先為光州人唐季從刺史
王緒入閩宋建炎中五世祖始遷于漳祖德元而上

皆居龍溪之施浦父國子教授諱東之再徙郡城是生
先生醇謹方質篤志古道尤明典禮甫冠由諸生試直
郡庠太守張公知其有身心之學延為弟子員師日端
坐黉舍衿佩傍侍側側屏息不敢游目眴帶履執經質
疑則俯就樂誨和氣見容色尋以省注教寧德安溪二
邑邑陋學廢至輒廣宮宇嚴奠祀揖讓跽音忌兩膝
著地跪也起
士悅民嚮漳學門廡圯郡府委董役事先生考制審禮
列戟肖像翼然有嚴循資陞廬峰山長丁內艱去官以

教授公老無復祿任意叅司移狀大府乞優注隣郡便
侍親庭再任泉州學正未幾教授公亦卒家居閉閣讀
書罕接塵事月吉必造郡庠陪舍菜禮丁祀羈呢脯菹
果非涉先生手陳主者不敢以祭天性孝敬親終皆及
期毫已且老哀慕痛毀有如早喪雖在家庭亦冠衣歛
容人未見其遽言怒色蓋古所謂典刑君子者安人李
氏淑慎有儀內相家法以成嚴整生子男三人文興文
昌皆恬雅好禮克荷世業文亨先卒女二人長適尚書

顏公曾孫順卿次適李彌光亦為名族孫男三曰仁濟
曰仁慈仁惠女五先生生甲申歿癸巳安人生辛巳歿
後先生三月至正戊戌十二月十八日合葬龍山之原
文亨瓦棺祔焉先葬期來乞銘唐臣夙聞先生言論且
辱世契銘曷辭銘曰

敬於身不作於人孝於親不愧於天嗚呼是為先生孝
敬之學垂于後而不泯者歟

梓堂隱君墓誌銘

隱君鄭姓諱文材自號曰梓堂大父而上失譜紀無考
父曰富母邵氏生隱君於前至元乙酉長為張氏壻生
子男四人曰觀曰延曰興曰新女三人觀生孫男四曰
德明智明信明女四延生孫男一曰崇女四興生孫男一
孫男一曰祥女五新生孫男二曰順泰女二德明生曾
孫女三義明生曾孫男一曰城智明生曾孫男一曰瑤
至正丁酉卒于清丘里居卜以巳亥正月壬寅葬孤觀
泣遣義明來致言於博陵林唐臣曰藐諸孤將葬先君

有日矣光諸幽者非得先生銘不可幸銘無讓惟隱君
生逢令期死終令命本蕃條茂逮見孫曾好德樂善之
報實於是焉驗傳曰德言足聞予於銘曷辭隱君性質
諒不矯弱年孤苦疊疊克樹立勤耕力學以為家訓子
孫遵承唯謹凡服闕授徒之人悉為公蓄吉凶有備衣
食有給一門四世雖愉無間鄉閭信而化之當畚寇陸
梁所在被脅從逆隱君戒鄉人曰所貴於為人者知善
惡逆順之判也來爾子弟能從吾擊賊吾當為爾結堡

聚糧以待賊至不然吾寧死不能事賊以求活也子弟
咸奮曰唯翁命既結堡而堅糧聚而實賊悉銳攻堡隱
君故開堡門以示整暇分民兵乘堡固守別簡揀精勇
出擊賊矢石雨發賊知堡不可破遂解去事平郡府上
其功版授以官輒辭曰某所以拒賊者初意不在是謂
觀等曰清丘密邇諸禽吾幸義率里人獲保雞犬若由
此而徵官賞脫復有警賊將仇我而構禍未已爾曹惟
勤爾耕力爾學圖所以起吾家者不徒武功之足尚也

九月戊子出唁親友徒還坐中堂集子孫於前曰吾覺
吾力已盡殆畢命今日旗山之麓吾所生也精爽是戀
其為吾葬所母感流俗用浮屠治喪語畢正襟歛容而
逝嗚呼生而潔其身死而正其禮弛張有道俯仰無愧
古所謂隱君子者殆不是過已宜為銘銘曰

翼翼梓堂昭昭隱德子孫克訓鄉閭是式人規商利我
教勤耕人媒武功我教明經草帶生庭禾箱滿谷彼慕
其榮我被其辱孺子食力德公遺安千載清風頑廉鄙

寬旗山之原鑑塘之許過者下車隱君之墓

故逸士林君墓誌銘

吾林自西晉之季黃門侍郎隸公南遷為閩中族姓第一石晉天福甲辰公再徙同安嘉禾里鴈塔山蔚為望族垂五百年譜牒兵燬不能詳矣然代生賢裔不墜厥世以克衍于後猶有可徵者存也當宋季江南被兵文獻凋落殆盡國子教授許友國公獨能自樹立於屯蹇之餘娶司理陳公女是生逸士諱天祥字時若常司

同安常平倉不屑升斗樂自韜晦與漁樵伍會鄰賊掠
其里公避地來漳余得叙宗誼知其中寬夷而無迫隘
之度外和易而無燥矯之容上焉則交乎其誠下焉則
各得其欲每惜其德之豐而位之畹也時之亨而身之
否也邑再有警公率里人築堡捍外侮耄稚賴之至正
甲辰六月五日以疾卒得年六十有八里人哀悼如其
所親公先娶安撫謝公女孫生子震敦武校尉涪州鹽
場司令繼娶尚書顏公女孫生女妙安適敦武校尉江

西行省理問官羅章內外榮養晚福方隆竟止中壽是
又足深惜也謝氏女二人長適胡次適葉皆士族孫男
六人女五人公卒之明年十一月壬辰葬於里之龍湫
山先期來請銘厥事先大父北山處士及聞高祖評事
府君實自鴈塔遷惠文山距唐臣僅六世猶在袒免下
列雖微且鄙然於銘也何敢辭乃為銘曰

長林鬱盤三子遺孺忠孝所傳世久愈著博陵象賢建
公闕田忠揚若蘊孝感若攢不忝厥前後澤是綿永島

之遷昌五百年博士自奮公成其先積深發茂理不爽
天子賢壻貴牙緋相鮮死不亡矣隱猶顯然龍山之原
吉其叶旃過者肅焉逸士之阡

竹泉胡君墓誌銘

至正乙巳五月二日胡君竹泉卒于家其友林唐臣走
哭之曰天乎學焉弗見施才焉弗見試吾猶幸吾友之
壽庶其行之可以望法于一鄉也今復奪之天果可責
報而取必哉惟君昆季之賢人士咸樂交游之而於鄙

父子彼此忘年相與特厚故予知之惟深將卜葬孤元陽以銘請嗚呼予其忍銘吾友耶予其忍於不銘吾友之賢耶遂叙之曰胡氏為漳望族君為胡氏佳子弟諱觀智字愚中父德齊公諱南孫家法峻整母顧氏既早喪父以其三子之相愛也為不繼娶君承顏侍饌朝夕不離側曲順親心父卒事兄如父母對客立侍終日雖小事必咨而後行族中弟姪歲時候問雜遝滿前年及五十猶不敢以父兄自居雅性沉重淑慎容止雖歡飲

至醉亦反反顧禮物雖見忤愠色不見延師接賓意在
優厚不計有無讀書講道務益身心不尚辭藻營小軒
於屋南日歛膝靜坐清泉翠竹相對忘言因以自號云
配盧氏先卒生男二人元陽其長也元益其次也女三
人君生丙辰卒年五十二月七日與先配合葬原曰
纏紫銘曰

守不失身施不失人嗟若胡君君子之倫嗚呼百世之
下欲知其行者尚徵此文

岐山陳君墓誌銘

君諱元善字長卿先世居龍溪縣之蓬洲再徙馬岐山復遷白石而岐山仍稱焉五世祖諱世英與北溪先生淳為從昆弟以儒業名家生子曰剛宋贈承事郎承事生沆登宋端平六年第歷官朝奉郎臨安府通判軍州事朝奉生祿登宋咸淳六年第授潮州法曹叅軍未官而宋亡法曹生南軒處士諱桂娶楊氏生三子君其長也君生簪纓仕族無紈綺浮薄之習能以詩書濟其世

禮訓肅其家誠厚信其鄉脩容山立而身若不勝衣內
美玉蘊而口若不能言生子光遠邦達光廸邦道皆知
學好義邦達嘗中閩省堂選君子謂陳氏所以能不墜
厥緒者以有長卿承之也至正丁未海壖

軟平聲

逃兵作

亂岐山距逆境近賊以君信於鄉欲先脅之以為人望
即君至曰能從我即汝生否則刀必割頸矣君罵曰吾
所畏者義不知畏者死汝賊豈能久生耶與其配郭氏
及三子皆遇害邦道在郡城得免於難嗟夫世之言不

撓其節類非柔者能之君退然一儒生而罵賊以死奮
無所避有若萬夫之雄何哉理明於心辭正於義故也
而郭氏死夫三子死父其倫理之懿舉無愧矣垂絕猶
續孰匪天耶君生庚戌死年五十有八郭氏生丁未死
年六十有一女一人適郭復生孫男女皆三明年戊申
十一月合窆岐山之麓邦道來請銘銘曰

維學之正必勵於行行之所難處變而定順生既孝義
死亦命一門全節古孰與競勒銘幽堂垂示無竟

艮翁楊先生墓誌銘

歲戊申閏七月八日儒學教授艮翁楊先生卒於清漳
官所其孤奉訓大夫廣州治中董度奉柩歸葬溫陵既
有日來泣拜言曰先君與屯田經歷公交久好篤某復
辱與子游實世契也敢以先銘請辭不獲命則誌之曰
先生本董姓諱相孫字敬在上世餘杭人曾大父世興
宋朝議郎同安監稅大父君選元從事郎潮陽縣尹幼
孤從母鞠於楊既而以楊入官遂不果復董姓父伯淵

泉州蒙古字學正母吳氏楊氏先為華陰人徙泉而益顯一門登第十有六人有諱汲者官至戶部侍郎四世曰宣教府君諱進德實鞠潮陽者其世次之可知者若此先生始以諸生為泉庠直學再補石井書院能公出納斥貪鄙以嚴正自持陞仙游教諭復學田之侵於豪右者凡若干畝攝縣事明邑民因爭殺女之誣部使感其言嘉嘆不已察甲弟毆嫂墮胎之妄甲兄受其教友愛如初轉教長泰為子董度行冠禮升降跪起肅予恭

遜之容而民知所尚朔望講義諄乎身心之學而士知所趨焉為莆學正陳叅政陳文龍死事請旌于朝餼尚書劉後村文集俾傳於世及考行省便宜授建寧路教未上德化縣缺官韓盧公適在省幕舉先生攝其乏時邑在盜先生躬造其巢諭降之卻其裝饋國子祭酒張公翥仲舉薦為儒學提舉而吏部奏授漳州教授張公為翰林承旨復申前薦命未下先生在漳學三年郡再被兵學廟莽為儲胥禮樂之器掠賣于市至為泣下屢以

老移退不允則請于大將移兵於它所亟補弊苴缺稍復舊規而廩入在額外者亦實其數于籍其官政之所施者類此先生自童子時學名才譽已聞於人及登釣磯丘先生之門則盡去凡近篤志理學體之於心而誠以立驗之於身而仁以行學者宗之戶屢常滿每告諸生曰聖賢之學高明正大稍涉於卑污偏駁則終於小人之歸為文章平實古雅務以理勝不事藻績嘗以舉子業一試有司不售即棄去此先生為學之正也天性

孝謹質諒父疾籲天減年割股投粥及卒哀毀逾禮負土
營墓廬於塚上三年然後歸母喪如父與人交不以久
近異情窮通易心初潮陽公歿遺命復董姓先生念其
祖之幼孤成立於楊恩不可忘而楊氏無後願加董姓
於楊氏之上庶俾二祀不絕移文莆學上郡府以事干
憲部不行每於時祭禮必均焉此先生行已之懿也先
是嘗得肺疾久而愈劇董度問後事曰吾老逢喪亂獲
保首領而有汝在目下復何囑乎言竟而逝先生生已

亥卒年七十有文集若干卷藏于家夫人顏氏生子一人董度也女二人長適將仕郎延平路知事林天祿次適王廷錫亦仕族孫男一謙光女一惟先生之學有得於聖賢之要故行已立身出於士君子之表而所歷弗克究其所蘊惜哉雖然生順而無愧死全而無虧其不亡者固存矣銘曰

學有要德既邵政有兆仕弗耀先克紹後克肖人是傲天不吊遺言矚來者詔

逸士蔡君墓誌銘

漢置五經博士李唐以還士用明經薦由是學者尚專
門之業有能博求其師而兼通數經者未始數數見也
若玉融逸士蔡君明善蓋有志乎是而不膠於一端之
陋者君諱復初明善其字幼穎敏從鄉先生林梅所余
大車受書治舉子業既又從進士盧先生諱希受詩晚
歲復學易其於三經研究奧旨折衷訓傳能得聖賢微
旨士類推先之嘗一試有司不售則慨然曰學貴有德

於身心科目進取利以誅人不足為也閉門讀誦風雨
寒暑不休羣經百氏以至虞初稗官稗論曲說靡不窮
討太守申公延致州庠誘成後進至正甲申閩饑君率
里人轉粟廣東憲閩方過糴君進言曰春秋之義為鄰
分災閩廣唇齒寧忍其饑而不卹耶廣為弛其禁粟得
達數千艘閩人以活屬所在盜起强有力者率武斷鄉
曲福寧陳甲與玉融陳一挾私怨以兵相嚮禍延齊民
君陳其罪於行省得命解之里賴以安性方介寡合然

每自信不疑有知之者則相與至篤無異情盧先生卒
心喪三年欲為立祠未克如願恒心切焉歲戊申某月
某日以疾卒年纔五十有二多士惜之祖曰應昂父曰
君祿俱潛隱弗曜配曰郭氏生五子長寬早世次曰密
實容實皆知學能文密仕方逮顯女一適陳克敬孫男
四術衍衛衛卜以某月某日葬某里之原實以某夙好
於君也來請銘既哭而言曰君子之施視其力所至不
以布衣衮裳而自廣狹其心也昔者魯仲連排難解紛

而無取趙悅道通商米以濟越饑君之所施小大雖殊
實亦庶幾焉嗚呼明善之學僅見於此耶是可悲已銘
曰

學之豐兮德之充世弗用兮士則宗猗若人兮曷有終
林生壙銘

生諱旺字彥興今從仕郎潮州路總管府經歷林君迪
卿之仲子幼敏而知學長通而習事以諸生補龍江書
院吏以能稱母戴氏既喪事父篤謹以孝聞方望其有

立也至正丙午正月十九日得病暴卒年纔二十有七
卜葬崎山之原距母塋一里許先是嘗泣謂父曰母早
喪兒仕未通幸大人得七品服法得疏恩於母稍紓兒
哀於孺生孝念至此而使不逮見卹典之榮是可悼已
銘曰
吾林以忠孝傳家何生有異行而不終於世

馬婦王氏壙銘

王女馬婦性淑慧夫為新恩龐樸士永新其名長小字

生子天信女信妹詩書克勤麻泉治有孫光澤嶷且異
光國光家又其次年享六袞餘有四丁酉初秋棄人世
赤土之原兆佳氣後九月窆下弦值作銘千載幽室賁
長林貢士唐臣氏

林登州集卷二十